

## 1380 aug 9, AKDOG

Archief Kommanderij Gemert van de Duitse Orde inventaris nummer 56, regist 67, dd 9-8-1380

Transcriptie Ad Otten, januari 1973

Heinric Heinrics soen vander Heze verpacht het goet Ten Boer aan Goeswijn Arnds Snieders soen. Het goed Ten Boer is een leen van de Duitse Orde.

Wij broeder Heynrich van Lewenbergh lantcommendur der Balien vanden Biessen doen cont en yegeliken dat voer ons sijn comen ende ghestaen ende voer onse manne van leen hier onder geschreven, Heinric Heinrics soen was vander Heze aen die een side ende Goeswijn Arnds Snieders soen was aen die ander side.

Welc Heinric voerszegt heeft verpacht Goeswijne voerszegt dat guyt geheyt ten Boer tot Gheemert gheleghen, met allen sinen toebehoerten dat Heinric voerszegt van ons te leen haudende is ende alsoe verre als hij daer in gherecht is, om elf mudde roeghen erfpachts der maten van Gheemert erflec te gelden ende jaerlics op Onser Vrouwen Lichtmisse dach in den guyde ten Boer voerszegt de voerszegde Heinric ende sinen naecomelinghen te gelden ende te betaelen met alsulker vorwarden toeghedaen off Goeswijn voerszegt ende sine naecomelinghe, Heinric voerszegt of sinen naecomelinghen dezen voerszegde pacht opten dach der gulden voerszegt nyet en betaelen so soude Heinric voerszegt off sine naecomelinghe haer hant slaen aen dat guyt voerszegt met allen sinen toebehoerten ende behaudent voer haer recht leenguyt ende Goeswijn ende sine naecomelinghe of wye van haren weggen opten guyde ten Boer voerszegt sit soelen rumen ende af varen sonder enech wedersegghen.

Met desen vorwarden so bekent Goeswijn voerszegt ende geloeft voer hem ende voer sine naecomelinghe:

Inne ende aen den voerszegde guyde ten Boer en gheen recht te behaudent, te vermethen noch aen te spreekken dan alsulken vorwarden te voldoen ghelijc voerschreven is alle arghelist uytghescheiden.

Ende wij broeder Heynrich van Lewenberch, lantcommendur voerszegt, om beeden wille Heinrics van der Heze voerszegt, ons mans van leen, so consenteren wij ende oerloven die vorwarden die boeven geschreven staen ende in mere bevestinghen so versueken wij onse manne van leen, dats te weten Dyederich van Gheemert erde Ansem Maes soen van der Hoefstat, dat sij haer zeghele metten onsen hier aen hanghen. In ghetugenisse der waerheit so hebben wij broeder Heynrich van Lewenberch, lantcommendur voerszegt, den seghel des wij vande ons ampts weggen gebruiken, aen desen litteren doen hanghen.

Ende wij Dyederich ende Ansem voerszegt, om versuec ons liefs heren, heer Heinrics van Lewenberch lantcommendurs voerszegt; So hebben wij onse zeghele metten sinen aen dese teghenwordighe litteren ghehanghe.

Ghegheven int jaer ons heren dusedt driehundert ende tachtentich op sente Laurenties avont des martelers.